

梓溪文鈔內集卷之六

明太史氏進賢舒芬國裳甫訂

裔孫 舒琛伯獻甫輯

舒璫季琰甫錄

後學 臨川吳撫謙汝則甫閱
進賢樊良樞尚默甫校

周禮定本六

六官圖釋

治官之屬六十

今考訂五十九

○大宰 小宰 宰夫 朝大夫

右四官建典佐王以統治者也

○宮正 宮伯 宮人 內宰 內小臣

閹人 寺人 內監

右八官王之左右侍御者統于冢宰則居于王所者必無險佞可以端治本也

○九嬪 世婦 女御 女史

右四官統于冢宰則必貞淑是述而可以成內治也

○膳夫 庖人 內饗 外饗 亨人 獸人

馘人 鼈人 腊人 酒正 酒人 漿人

右十二官統于冢宰者謹飲食之節以保王躬治之本也

○弁師 司服 司裘 內司服 典婦功

典絲 典枲 掌皮 縫人 染人

追師 履人

右十二官統於冢宰者正王衣服之制亦所以養王心也

○醫師 食醫 疾醫 瘍醫 獸醫

右五官慮疾病之變也知五官統于冢宰之意則知天下之疲癯殘疾顛連而無告者皆惟冢宰之是望也

○內史 外史

右二官記王之言與事者亦統于冢宰此王常立于無過之地與

○御史

右一官冢宰賴以自治者

○甸師

右一官列治典者王以民為天民以食為天師民以農乃食之源治之本也

○凌人 司燿

右二官統於冢宰者燿理節宣治必求至于是也

○大府 玉府 內府 外府 司會 職內

職歲 職幣

右八官列治典者蓄積國家之大命為治之急務也

教官之屬六十 今考訂五十七

○大司徒 小司徒 鄉師

右三官掌建教典者

○鄉大夫 州長 黨正 族師 閭胥

比長

右六官所謂以三物教萬民者

○師氏 保氏

右二官統于司徒見王者之教本諸身也

○諸子

右一官統于司徒見王者之教始于家也

○司諫 司救

右二官為教屬者教莫先于定賞罰以明善惡之歸也

○司市 質人 廛人 胥師 賈師 司蹏

司稽 肆長 泉府 司門 司關

右十一官為教屬者教莫急于禁習染以嚴義利之辨也

○媒氏

右官為教職者男女之欲聖人不敢絕之也亦為之教以平其欲心焉

○調人

右官為教職者父兄之怨聖人不敢非之也亦為之教以釋其怨心焉

○大司樂 樂司 大胥 小胥 大司

小師 瞽矇 眡瞭 典同 磬師

鍾師 笙師 搏師 鼓人 舞師

○韎師 旄人 籥師 籥章 鞀鞀氏

典庸器 司干

右二十二官列於教職者欲學者和順于道德而成于樂之意也

○伊耆氏

右官統于司徒者明王者優待老臣以教民之孝也

○封人 牧人 牛人 充人 羊人 小子

右六官皆為牲事以屬教官者明王者之致謹鬼神以教民之敬也

○司祿

右官職亡疑不釋

禮官之屬六十

今考訂五十四

○大宗伯 小宗伯 大肆師 小都宗人

家宗人

右五官掌建禮典者

○鬱人 鬯人 司尊彝 司几筵 籩人

醢人 醢人 鹽人 冢人

右九官統于宗伯者禮莫先于祭茲皆所以備祭儀者也

○大僕 小臣 祭僕 御僕 隸僕 宗婦

○內宗 外宗

右八官統于宗伯者相禮于宗廟朝廷者也

○大卜 卜師 龜人 蕞氏 占人 筮人

右六官統于宗伯者蓋卜筮者所以信時日敬鬼神宗官之事也

○大祝 小祝 喪祝 甸祝 詛祝 司巫

男巫 女巫 女祝

右九官統於宗伯者蓋巫祝者所以慎祈禱交鬼神宗官之事也

○天府

右一官統于宗伯者示禮之有所自雖天子不得專也

○守祧

右一官統于宗伯者示禮之有所殺雖天子不得降也

○大史 小史

右二官統于宗伯者典章之所由考也

○典瑞 典命

右二官統于宗伯者儀則之所由定也

○馮相氏 保章氏 眡祲 占夢

右四官統于宗伯者蓋達于天人之際而不迷于吉凶悔吝之途非知禮之至行禮之盡者則或流為識緯術數之學矣

○鷄人

右一官統于宗伯著祭時之有定

○典祀

右一官統于宗伯著祭典之無遺

○夏采

右一官統于宗伯者君臣未訣之際禮莫謹焉者也

○方相氏

右一官統于宗伯者鬼魁妖禍之除禮難廢焉者也

○職喪 冢人 墓大夫

右三官統于禮典者喪為凶禮之首葬為喪禮之終

政官之屬六十

今考六十

○大司馬 小司馬 軍司馬

右三官掌建政典者

○輿司馬 行司馬 都司馬 家司馬

右四官職亡亦名顯不必什竊意輿司馬行司馬猶夫兩司馬不當列銜然又疑輿司馬之為車正也平居則名中車用兵則名輿司馬與

○司士

右一官屬司馬見用人為政之首務

○射人

右一官屬司馬者射固武事然擇士實以觀德也故次司士之下

○虎賁氏 旅賁氏 節服氏

右三官屬典兵之官者衛內莫切于備輦轂也

○掌固 司險

右二官屬典兵之官者
扞外莫要于慎封守也

○巾車 典路 車僕 司右 戎右 齊右

○道右 大馭 戎僕 齊僕 道僕 田僕

馭夫

右十三官統于司
馬者所以備車也

○校人 馬質 趣馬 巫馬 牧師 庾人

○圉師 圉人

右八官統于司馬
者所以備馬也

○司甲 司兵 司戈盾 司弓矢 繕人

○橐人

右六官統于司馬者所以備器械也
合上二圖觀之見王政內修之嚴也

○環人

右一官在此
示可以戰也

○挈壺氏

右一官在此示
用兵有時也

○司常

右一官在此示
行師有律也

○懷方氏 合方氏 訓方氏 匡人 撝人

右五官統于司馬皆所以服遠人而致懷柔之意也

○大行人 小行人 司儀 行夫 候人

○掌客 象胥 掌節 此官職文皆小行人所備當併入小

行人而別此衙 掌交 則官為不冗

○掌 右九官統于司馬者見懷諸侯為政之大也

○服不氏 射鳥氏 羅氏

右三官在此者示軍政之肅也

刑官之屬六十 今考訂五十

○大司寇 小司寇 士師

右三官掌建刑典者

○鄉士 遂士 縣士 方士 訝士 朝士

都士 家士 按方士職文則都家獄訟禁令縣法皆主之此都士家士二職

宜剔之而方士末二句亦宜并剔之也 右八職皆以士名要皆明刑者也

○司民

右一官統于司寇欲刑官知民命之重也

○司刑

右一官見刑必當其罪

○司刺

右一官見罪必原其情

○司烜氏

右一官統于司寇者示刑獄貴明也

○司約 司盟

右二官統于司寇者示刑罰貴信也

○職金

右一官統于司寇者皆以民之爭心每起于利而不知有刑與

○禁殺戮 禁暴氏

右二官所謂辟以止辟因民之所惡而去之也

○野廬氏 司寤氏 脩閭氏 銜枚氏

掌訝

右五官皆詰奸慝禁于未然之意也

○條狼氏

右一官亦詰奸慝戒于不慮之意也

○司圜

右一官言于罷民姑收教之不忍加刑也

○司厲 司囚 掌戮

右三官言于賊盜必殺之不敢失刑也

○蜡氏 雍氏 萍氏 冥氏 庶氏 穴氏

○翬氏 柞氏 雉氏 碧族氏 翦氏

○赤友氏 蝮氏 壺涿氏 庭氏

○右十五官統于司寇者見先王之制刑無往而非與民除害之意也

○犬人

○右一官備祭祀之牲者統于司寇示用刑之心必可對神明也

○司隸 此下舊本附罪隸蠻隸閩隸夷隸貉隸五職今詳五者不當列官示為民極之意但取其文附于

○司隸而沒其官 右一官職四翟之人也統于司寇示用刑之效不獨刑邦國也

○掌察 掌貨賄 都則

○右三官職 亡疑不釋

事官之屬六十

今考訂五十三

芬按太宰建六典六曰事典以富邦國以任百官以生萬民書周官曰司空掌邦土

居四民時地利記王制曰司空執度地力凡使民任老者之事食壯者之食又曰

凡居民山川沮澤時四時量地遠近與事任居必參相得也夫事典與周官言相表裏

王制雖漢儒所記而量地制邑之說恐亦是司空舊職未可盡棄况詩大雅綿云乃

召司空乃召司徒俾立室家韓奕云溥彼

韓城燕師所完注云大封之禮召公之世職蓋以召公世職司空也故申伯封謝亦

命召公往營城邑崧高黍苗之詩可考合詩書所言質之事典焉則不必王制而司空之屬大畧可見矣

○大司空 小司空 即遂人也 遂師

右三官建事典者

○遂大夫 縣正 鄙師 鄆長 里宰

隣長

右大官所事同體既不可謂之教亦不可謂之禮又不可謂之政刑當為事官無疑

○土訓 誦訓

右二官屬司空者欲王知所建國居民也

○司稼 草人 稻人 場人

右四官富邦國生萬民之本也豈非司空之屬哉

○囿人 掌蓄

右二官為事職者亦民生之所資也

○載師 閭師 縣師

右三官皆任土作貢之事也

○均人 稍人

右二官皆均賦平役之事也

○旅師

右一官居新毗者
非司空之屬而何

○山虞 林衡 川衡 澤虞 迹人 非人

○角人 羽人 掌葛 掌染草 掌炭

掌茶 掌蜃

右十三官統于司空者蓋皆
九職所謂作山澤之材者

○舂人

右一官見國家富
而祀饗豐潔也

○廩人 舍人 倉人

右三官見蓄積多
而凶災有備也

○遺人 委人 橐人 橐字當作犒

右三官為事職者見國用足
而百度舉司空富之之效也

○職方氏 形方氏 山師 川師 邊師

右五官屬司空者以所職
皆度地建國居民之事也

○司勳

右一官在此者蓋書勳
頒賞地乃司空之事也

○量人

右一官在此者蓋大封
營城邑乃司空之職也

○掌舍 幕人 掌次

右三官為事典者雖王暫時舍次其營度
規制之嚴猶造國都也非司空之屬而何

周禮定本七

周官別偽

天官篇

太宰職文

以經邦國下以治官府以紀萬民

以安邦國下以教官府以擾萬民

以和邦國下以統百官以諧萬民

以平邦國下以正百官以均萬民

以詰邦國下以刑百官以糾萬民

以富邦國下以任百官以生萬民

共四十八字

此何以別曰六典以治邦國八法以治官

府八則以治都鄙此太宰之大凡也今列

六典并官府萬民而治之則八法八則將

不必施矣故知其偽

置其輔下凡治以典待邦國之治以則待都

鄙之治以法待官府之治以官成待萬民之

治以禮待賓客之治

共三十八字

此何以剔曰典法則具見于止此復言之
固為煩冗而官成待萬民之治乃小宰之
職禮待賓客之治乃大小行人司儀掌客
之職顧以足成此文又非篇中所具之凡
也故知其偽

冢宰聽之下待四方之賓客之小治 九字

此何以剔曰賓客之小治有訝訝治之非
冢宰之事也故知其偽

小宰職文

含禭幣玉之事下月終則以官府之敘受群
吏之要贊冢宰受歲會 十九字

此何以剔曰以敘受其會此宰夫之職之
凡也小宰顧以敘受月要不甚繁細乎至
若冢宰受會聽事則以詔王廢置非小宰
所當與也故知其偽

宰夫職文

掌其禁令下敘群吏之治以待賓客之令諸
臣之復萬民之逆 十九字

此何以剔曰宰夫之於賓客職在以牢禮
 掌之法掌其牢禮委積膳獻飲食賓賜之殮
 牢與其陳數不得敘群吏以待令若臣民
 之復逆則大僕小臣御僕自專職也故知
 其偽

宮正職文

職首掌王宮之戒令糾禁

八字

此何以剔曰小宰職首一條卽此錯簡今
 移小宰之文於此則語意尤爲詳盡八字

故知其僞

宮伯職文

行其秩敘下作其徒役之事

六字

此何以剔曰徒役之事國中服公事者宜
 舍况于王宮之士庶子乎且與下文作宮
 衆複而不類故知其僞

內宰職文

職首書版圖之法以治王內之政今均其稍
 食分其人民以居之

二十三字

而賞罰之下會內宮之財用正歲均其稍食
 施其功事憲禁令于王之北宮而糾其守二十八字
 此何以別曰內宰以禮佐后猶冢宰以道
 佐王所職非細故也况書版圖均稍食會
 財用施功事憲禁令糾舍守皆宮正之職
 有可據乎故知其偽

內小臣職文

王后之命下正其服位四字

喪紀則擯下詔后之禮事相九嬪之禮事正

內人之禮事一十七字

此何以別曰內小臣之設雖視外猶宰夫
 也但其職守不過給使令之役若所謂前
 驅徹俎四方則使往也正服位詔禮事皆
 內宰之守也彼豈得干邪故知其偽

寺人職文

致于有司下佐世婦治禮事掌內人之禁令
 一十二字

此何以別曰其治禮事義同內小臣掌內

人之禁令則職首已備此為重出而多逸者故知其僞

庖人職文

其出入亦如之下凡用禽獻至膏羶

三十二字

此何以剔曰賓客致禽則膏香膏臊等不得并獻况春行膏豚一條四行字皆當作宜字依內則而并歸于食醫牛宜稌章下乎彼既錯誤故知其僞

內史職文

以詔王下治一曰爵二曰祿三曰廢四曰置五曰殺六曰生七曰予八曰奪

二十五字

此何以剔曰大宰八柄實為內史之事其文視此為加詳焉故以易之非剔也

大府職文

以待賜予下凡邦國之貢以待弔用凡萬民之貢以充府庫凡式貢之餘財以供玩好之用

三十字

此何以剔曰以九貢九賦九式例之故知

其偽

外府職文

待邦之用下凡有法者四字

此何以剔曰於上下文皆無所屬且不見其所凡故知其偽

司會職文

都鄙之治下以九貢之法致邦國之財用以九賦之法令田野之財用以九貢之法令民職之財用以九式之法均節邦之財用四字

此何以剔曰此蓋錯出大宰之文而致財用均財用則非司會計而受貳者之事也故知其偽

司書掌邦之六典八法八則九職九正九事邦中之版土地之圖以周知出入百物以敘其財受其幣使入於職幣凡上之用財用必攷于司會三歲則大計群吏之治以知民之財器械之數以知田野夫家六畜之數以知山林川澤之數以逆群吏之徵令凡稅斂掌事

者受法焉及事成則入要貳焉凡邦治攷焉
此一官并職通剔之說見序辨

地官篇

大司徒職文

而有獄訟者下與有地治者五字

此何以剔曰舊以司空之文為司徒故有

此偽

治其政令下大荒大札則令邦國移民通財

舍禁弛力薄征緩刑二十字

此何以剔曰舊以司空之文為司徒此條

宜屬司空矣但司空有荒政十二以聚萬

民視此加詳故知此為司徒之文之偽

小司徒職文

鄉之衆寡下六畜車輦辨其物七字

五師為軍下以起軍旅以作田役以比追胥

以令貢賦一十六字

羞其肆下小賓客令野脩道委積九字

及其衆寡下六畜兵器四字

此何以剔曰冬官舊亡今小司空之職守
明故知其偽

鄉師職文

而聽其治下以國比之法以時稽其夫家衆
寡辨其老幼貴賤廢疾馬牛之物辨可任者
與其施舍者掌其戒令糾禁聽其獄訟
此何以剔曰鄉師教官之攷也而有事事
官此必事官之斷簡錯文也故知其偽

族師職文

廢疾可任者下及其六畜車輦六字

此何以剔曰族師亦教官也六畜車輦非
所當辨况百家之內車輦亦不得俱備故
知其偽

胥各掌其所治之政執鞭度而巡其前掌其坐
作出入之禁令襲其不正者凡有罪者撻戮
而罰之

此官自胥各至鞭度十一字剔之其下并
入司市說見序辨通錄于此猶司書土均

不沒其實也

大司樂職文

教國子舞下雲門大卷大咸大磬大夏大濩
大武以六律六同五聲八音六舞大合樂以
致鬼神示以和邦國以諧萬民以安賓客以
說遠人以作動物乃分樂而序之以祭以享
以祀乃奏黃鍾歌大呂舞雲門以祀天神乃
奏太簇歌應鍾舞咸池以祭地示乃奏姑洗
歌南呂舞大磬以祀四望乃奏蕤賓歌函鍾

舞大夏以祭山川乃奏夷則歌小呂舞大濩
以享先妣乃奏無射歌夾鍾舞大武以享先
祖凡六樂者文之以五音播之以八音凡六
樂者一變而致羽物及川澤之示再變而致
羸物及山林之示三變而致鱗物及丘陵之
示四變而致毛物及墳衍之示五變而致介
物及土示六變而致象物及天神凡樂園鍾
爲宮黃鍾爲角大簇爲徵姑洗爲羽雷鼓雷
鼗孤竹之管雲和之琴瑟雲門之舞冬日至

於地上之園丘奏之若樂六變則天神皆降
可得而禮矣凡樂函鍾爲宮大簇爲角姑洗
爲徵南呂爲羽靈鼓靈鼗孫竹之管空桑之
琴瑟咸池之舞夏日至於澤中之方丘奏之
若樂八變則地示皆出可得而禮矣凡樂黃
鍾爲宮大呂爲角大簇爲徵應鍾爲羽路鼓
路鼗陰竹之管龍門之琴瑟九德之歌九磬
之舞於宗廟之中奏之若樂九變則人鬼可
得而禮矣

此何以剔曰六代之樂皆當有聲有容獨
以教舞非也且以上文樂德樂語例之又
以下文六律六同五聲八音同六舞以爲
言觀之則舞蓋綴兆疾徐之類也此雲門
以下十七字之僞可知夫旣曰大合樂以
致鬼神示又曰分樂而序之以祭以享以
祀此其言自相牴牾况禮莫重於祀天神
以司服觀之雖冕服亦因祭大小降殺而
樂舞之用乃儕天神於四望山川群祀而

略無所別何邪且旣曰舞大濩以享先妣
大武以享先祖又曰九德之歌九磬之舞
於宗廟之中奏之則是大夏大韶矣又何
其言之而不相應邪夫川澤山林丘陵墳
衍之示卽土示也土示卽地也宜其感格
之同夫何川澤之示一變而致山林之示
再變而致丘陵之示三變而致墳衍之示
四變而致邪四者旣致則土示卽此而在
矣又曰五變而致土示何邪旣曰五變而

致土示則地示卽此而在矣又曰八變而
地示皆出何邪論語曰始作翕如也蓋言
六律六同五聲八音六舞不備不足以言
樂今言祀天神祭地示享人鬼律同每用
四而缺其八五聲每用四而缺其一八音
每用三而缺其五六舞每用一而缺其五
何邪夫旣曰奏黃鍾歌大呂舞雲門以祀
天神又曰圜鍾爲宮黃鍾爲角大簇爲徵
姑洗爲羽雷鼓雷鼗孤竹之管雲和之琴

瑟雲門之舞冬日至于地上之園丘奏之是黃鍾既不得爲宮大呂復置而不用又何其言之不相應邪大抵此章之僞亦有由然按書藝文志云六國之君魏文侯最爲好古孝文時得其樂人竇公獻其書乃周書太宗伯之太司樂章也註云竇公年百八十歲兩目皆盲文帝竒之問曰何因至此對曰臣年十三失明父母哀其不及衆技教鼓琴瑟臣導引無所服餌夫既十

三失明安得有書此可以知其僞也又按元儒吳澄亦極辨此章不經其言曰既曰以六律六同五聲八音六舞大合樂以致鬼神示是祭祀合樂之際六律六同五聲八音六舞竝用矣而其下止用黃鍾大呂雲門祀天止用大簇應鍾咸池祭地止用姑洗南呂大磬祭四望止用蕤賓函鍾大夏祭山川止用夷則小呂大濩享先妣止用無射夾鍾大武享先祖如是則六

律六同五聲八音六舞各自爲用不得謂之大合樂矣凡作樂必律呂聲音一時並舉克諧而不相奪倫然後成樂今旣各自爲用何自而成樂乎况周家祭祀已行之迹莫詳於詩頌今考昊天有成命之詩郊祀天地是天地無分祭之文考般之詩望祀四嶽河海是四望與山川無異祭之文考雍之詩禘祖而其末則曰旣右烈考亦右文母是妣與祖亦無各祭之文考周頌

之詩盡是祭祀之詞其言作樂未聞有分樂而序之之說亦未聞用歷代之樂以分祀之禮此甚不足信又曰六樂者文之以五聲播之以八音凡六樂者一變而致羽物及川澤之示再變而致羸物及山林之示三變而致麟物及丘陵之示四變而致毛物及墳衍之示五變而致介物及土示六變而致象物及天神凡樂園鍾爲宮黃鍾爲角大簇爲徵姑洗爲羽雷鼓雷鼗孤

竹之管雲和之琴瑟雲門之舞冬日至於
地上之園丘奏之若樂六變則天神皆降
可得而禮矣云至人鬼可得而禮矣既
曰六樂文之以五聲播之以八音是六樂
之作五聲八音竝用之矣而其下則禮天
神地示人鬼於五聲皆止用其四于八音
止用其三使果如此則聲音不備樂何自
而作况考之於詩有瞽作樂而合乎祖其
間用鞀磬祝圉簫管等樂於祭宗廟之際

固亦兼用竹革木石之音矣孰謂去此而
不用乎先儒有釋四聲之說者謂樂無商
聲者祭尚柔商陞剛也考之於詩武奏大
武而言勝殷退劉之事勺告成大武而言
於鑠王師之事非堅剛之意乎况前言祀
天神止奏黃鍾歌大呂祭地示止奏大簇
歌應鍾祭先祖止奏無射歌夾鍾與此文
不同既曰凡六樂者一變至六變合六樂
而言之至於七變八變九變則餘三變又

不預焉况樂所以象德而六樂之致鬼神
示不知何分而象德邪考舜之作樂感格
之效自近以及遠先格祖考次格鳳凰百
獸等物今乃自遠以及近一變致羽物及
川澤之等示神物至九變而後及人鬼舜
樂所以感物者又未嘗以某樂感某物以
某樂感某神帝王作樂之意大槩相似何
獨成周之樂而不然乎余故曰此文不唯
不經仍自相背戾不足信也

大胥職文

以鼓徵學士下序宮中之事 五字

此何以剔曰此官與王宮之事無預此必
內宰宮正之錯簡也

封人職文

王之社壝下爲畿封而樹之 六字

社稷之壝下封其四疆造都邑之封域者亦
如之 十四字

此何以剔曰封人職在牛牲其設社稷之

壇有事乎神也若樹畿封封四疆則固大
 小司空之事豈封人之力所能及哉但此
 教官之篇多是事官之錯簡不能一一編
 次姑剔之
 饌人掌凡祭祀共盛共王及后之六食凡賓客
 共其簋簠之實饗食亦如之

此一官并職通剔之說見序辨

春官篇

大宗伯職文

掌建邦之下天神人鬼地示之 七字

此何以剔曰此與下文為目也下文列吉
 凶軍賓嘉五禮而此惟舉吉禮之凡故知
 其偽今去此七字補一五字則與下文脗
 合矣

世婦

世字今作宗字

說見序辨

大史職文

職首掌字下建邦之六典以逆邦國之治掌
法以逆官府之治掌則以逆都鄙之治凡辨
法者攷焉不信者刑之凡邦國都鄙及萬民
之有約劑者藏焉以貳六官六官之所登若
約劑亂則辟法不信者刑之 七十四字

以次位常下辨事者攷焉不信者誅之 十字

此何以剔曰大史所掌者禮事與夫君舉
則書之與內外史相表裏也今日建典與
夫掌法則之事則大宰之職也辨法貳約

劑及辨事不信者刑之誅之則秋官司約
司盟之職也故知其僞

夏官篇

大司馬職文

挾日而斂之下乃以九畿之籍施邦國之政
方千里曰國畿其外方五百里曰侯畿又其
外方五百里曰甸畿又其外方五百里曰男
畿又其外方五百里曰采畿又其外方五百
里曰衛畿又其外方五百里曰蠻畿又其外

方五百里曰夷畿又其外方五百里曰鎮畿

又其外方五百里曰藩畿 一百零六字

此何以剔曰此章乃職方氏之錯簡也九

畿字皆宜作服字以入于職方氏其國畿

字亦從職方氏作王畿則於彼無疑誤於

此無偽經矣

司士職文

都家縣鄙下之數 二字

此何以剔曰二字衍文也以上文年歲貴

賤例之盖可見矣

射人職文

職首掌字下國之三公孤卿大夫之位三公

北面孤東面卿大夫西面其摯三公執璧孤

執皮帛卿執羔大夫執鴈諸侯在朝則皆北

面詔相其法若有國事則掌其戒令詔相其

事掌其治達 六十七字

此何以剔曰此官在周官非常設者有事

于射則特設焉今觀此文盖錯出宰夫小

宗伯而且逸也安知其非偽也邪

秋官篇

大司寇職文

佐王刑邦國下誥四方 二字

此何以剔曰以上四官文例之則此三字

為衍以理求之四方豈在邦國之外乎故

知其偽

登之于天府下大史內史司會及六官皆受

其貳而藏之 十六字

此何以剔曰邦之大盟約則司盟約有專

職矣司寇統之天府藏之正欲嚴密其事

不欲以為訓也六官皆受其貳何邪且既

曰六官皆大史春官之屬也內史司會天

官之屬也亦受而藏之何政之多門邪周

公之法必不如是故知其偽

小司寇職文

登于天府下內史司會冢宰貳之以制國用

十二字

王拜受之下以圖國用而進退之 八字

此何以剔曰獻民數于王王拜受之登于
天府重民數也非謂卽此民數制國用也
王制豕宰於歲之抄制國用蓋歲之豐凶
量入以爲出非是之謂也若以民數圖國
則民皆府史胥徒之類仰給于公上矣然
則此經貳條其僞明矣

士師職文

爲邦誣下若邦凶荒則以荒辨之法治之令

移民通財糾守緩刑 二十一字

此何以剔曰此荒政十二之四目也蓋事
官之事而非刑典雖朝士慮刑貶之旨與
此荒辨亦有異焉故知其僞

方士職文

而誅賞焉下凡都家之士所上治則主之 十一字
此何以剔曰方士旣掌都家以時脩其縣
法安得復有都家之士哉周官設官必不
如是之煩瑣也此職旣專乃知都士家士

二官亦宜并剔之也

都士職

亡

家士職

亡

而此二官雖其職亡亦宜剔之說見序辨

柞氏職文

掌攻下草一字

此何以剔曰衍字也柞氏攻木雉氏殺草

各專一職况其職未唯曰凡攻木者掌其

政令而不及草乎

布憲掌憲邦之刑禁正月之吉執旌節以宣布

于四方而憲邦之刑禁以誥四方邦國及其都

鄙達于四海凡邦之大事合衆庶則以刑禁號

令

此一官通職剔之說見序辨

各官篇

大司空職文

以天下土地之圖下周知九州之地域廣輪

之數辨其山林川澤丘陵墳衍原隰之名物

而 二十七字

此何以剔曰地域廣輪之數卽下文邦國都鄙之數也山林川澤丘陵墳衍原隰之名物卽下文五地之辨也此既不與下文爲目而自爲一章故知其僞

以阜人民下以蕃鳥獸以毓草木以任土事
十二字

此何以剔曰辨十有二土之名物以相民宅利害爲主卽後世地里風水之說源流

也若夫蕃鳥獸毓草木則固下文十有二壤稼穡樹藝之類而任土事亦土均之法之屬也故知其僞

以爲地法而待政令下頒職事十有二于邦國都鄙使以登萬民一曰稼穡二曰樹藝三曰作材四曰阜蕃五曰飭材六曰通材七曰化材八曰斂材九曰生材十曰學藝十有一曰世事十有二曰服事

六十八字

此何以剔曰與舊本大宰九職相表裏而

彼詞義為明鬯也今以彼易此而此條剔
日之若謂頒職事以登萬民其義亦未通也

遂人

此官舊本序在遂師遂大夫之上詳味文
勢即小司空也今以此職補小司空而此
官則剔之也

小司空職文

使各掌其政令刑禁下以歲時稽其人民而
授之田野簡其兵器教之稼穡

二十字

此何以剔曰此章分言經制隣里鄣鄙縣
遂規模未及治野之政也况所謂簡兵器
者亦非事典之所存邪惟若遂大夫所謂
簡稼器修稼政則庶幾周人重農之意也
遂大夫職文

夫家之衆寡下六畜田野辨其可任者與其

可施舍者

十五字

此何以剔曰鄉大夫文一條視此加詳故
以易之且以在教典非其職也

均人職文

均人民下牛馬車輦四字

此何以剔曰均力政以歲豐凶均其民力

也與牛馬車輦夫家之政殊

掌炭職文

以共邦之用下凡炭灰之事五字

此何以剔曰衍文也

舍人職文

職首掌下平宮中之政分其財守以法掌其

出入十五字

此何以剔曰此官職在米粟之用雖有共

王后獻種之文而宮中之政非其所能也平

土均掌平土地之政以均地守以均地事以均

地貢以和邦國都鄙之政令刑禁與其施舍禮

俗喪紀祭祀皆以地媿惡為輕重之法而行之

掌其禁令

此一官并職通偽剔之詳見序辨

職方氏職文

鄉掌天下之圖以下掌天下之地五字

此何以剔曰天下之地雖冢宰亦不得而專掌也况三代之隆分土建國天子亦惟制千里王畿職方氏顧得掌天下之地哉

以理勢度之自見其僞
土方氏掌土圭之法以致日景以土地相宅而建邦國都鄙以辨土宜土化之法而授任地者王巡守則樹王舍

出此一官并職通剔之詳見序辨

終